

# BOKAMOSO

ISSUE 31 MOPITLO 2009

LEKWALO LA DIKGANG LA MALOKO A LETLOLE LA PHENSHENE LA DEBSWANA



## Kgatlwane ke leloko le lesa la SAPFIF Advisory Committee ●●●



**Tiny Kgatlwane**  
Principal Executive Officer

Moeteledipele wa Debswana Pension Fund, Mme Tiny Kgatlwane o tlhophilwe go nna leloko la komiti kgolo ya Southern Africa Pension Fund Investment Forum (SAPFIF) Advisory Committee.

Lekgotla la SAPFIF le tsamaisiwa ka tatediso ya komiti (Advisory Committee) e, e nang le baemedi go tswa mo matloleng a magolwane a diphenshene borwa jwa aferika ka bophara. Tiro ya komiti e ke go tthomamisa gore maikutlo a maloko otlhe a lekgotla le la SAPFIF mabapi le dikgwetho tse di lebagangeng diphenshene tse di mo borwa jwa aferika, a sekegelwa tsebe otlhe.

Maikaelelo a lekgotla la Southern Africa Pension Fund Investment Forum ke go tokafatsa metswedi ya kitso le boitseanape go thusa baeteledipele ba diphenshene go tsamaisa matlole a bone ka botswerere le ka seemo se se kwa godimo, go tokafatsa dipolelo tsa

dipeeletso tsa matlole le go oketsa kitso ya bone ka tsamaiso ya matlole. Go diragatsa maikaelelo a, lekgotla le le nna le dithutopuisano kgapetsa tse di farologaneng.

Go tlhophiwa ga ga Mma Kgatlwane ke kgatelopele mo go rona mo DPF ka gore se se tla re baya mo maemong a a kwa pele ka boitseanape jwa tsamaiso ya matlole. Re na le tsholofelo ya gore kitso e Mma Kgatlwane a tlaa e anyang mo lekgotleng le e tlaa sologela maloko a DPF mosola fela thata.

Bangwe ba maloko a SAPFIF ba tswa mo mafatsheng a South Africa, Botswana, Namibia, Swaziland, Zimbabwe le dikompone dingwe tsa mafatshe-fatshe. Komiti e e kopana gararo mo ngwageng.

Re akgola Mma Kgatlwane, e bile re dumela fa a tlaa re emela sentle kwa lekgotleng le.

## Tiro e tswelletse mo DPF

Maloko otlhe a itsisiwe gore diofisi tsa letlole di tlaa tswelela di butswa jaaka go tlwaelesegile le fa go ka tswa go tswetswe mo dikomponeng tsa Debswana. Bagodi le maloko a a sa ttholeng a bereka mo dikomponeng tsa Debswana ba tlaa tswelela ba

thusiwa jaaka gale.

Ba ba tsereng malatsi a boikhutso ka mabaka a go tswalwa ga dikompone, ba ka dirisa nako ya bone ya boikhutso go tla go itse ka seemo sa diphenshene tsa bone le go ithuta ka tsamaiso ya phenshene, bogolo jang ba ba ka tswang ba eletsa go itlhophela go chaisa mo tirong.

Re tlaa leka ka natla go thusa botlhe ba ba tlhokang thuso mo nakong e. Ikopanye le rona ka megala kgotsa o re etele kwa; Plot 682/683 Visible Edge (BP Building) Ground Floor go lebagana le Debswana House, Main Mall

Re thusa maloko go simolola ka 0800hrs go fitlha 1645hrs

## Inside ●●●

* Kgatlwane ke leloko le lesa la SAPFIF Advisory Committee	Pg 1
* Kakgelo Le Dikitsiso	Pg 2
* Go tla letsapa la moya le mmele le le bakwang ke Letlhoko la madi	Pg 3/4
* Tsela pedi o tsaya efe?	Pg 5
* Maeto a 2008	Pg 6
* Dipotso tsa gago le dikarabo	Pg 7
* Isago & Letlole	Pg 8

## DI ATERESE LE MEGALA

The Principal Officer, Debswana Pension Fund, Ground Floor Visible Edge (BP Building), The Mall P/Bag 00512 Gaborone, Botswana

Tel: 361 4236/4267/4318/4366

Fax: 393 6239

Mogala wa mahala: 0 800 600 681

Email: bokamoso@debswana.bw

## DINAKO TSA GO ETELA LETLOLE

Mosupologo go ya go labothano

0800h - 1645h (Le ka nako ya dijo tsa motshegare)

## Tebelapele Ya Rona

Go nna letlole la diphenshene la mmamoratwa la maemo a nthla mo sechabeng sa Botswana ka kakaretso

## Maitlamo A Rona

Re itlamo go fa maloko thuso ya maemo a a kwa go dimo, le go tthomamisa bokamoso jwa letlole ka ditsela tse di latelang;

- Botswerere mo tthokomelong ya madi a maloko
- Bothakga mo tirong le tsamaiso ya letlole
- Go ruta le go buisana le maloko ka nako tsotlhe

## Setho sa rona - re batla go tsege ba:

1. Boitseanape le Boeteledipele
2. Boikanyego le Tshiamo
3. Botho
4. Tlotlo mo malokong
5. Botswerere mo tirong

## KAKGELO



Agatha Sejo

“Lefatshe jaaka le aparetswe ke kwelo tlase ya itsholelo, maikutlo a batho a huduegile, mme malapa a lebagangwe ke dikgwetlho tse di boima tsa letlhoko la madi. Le fa go ntse jalo, gatwe tsholofelo ga e tshabise ditlhong.”

Fa go na le selo se le sengwe se sika loo motho le ka ipelang ka sone ke mpho ya tshaloganyo e modimo a e re fileng. Fa motho a ipoleletse gore ga gona botlhoko bope jo bo ka kgoreletsang boitumelo jwa gagwe mo botshelong, e le ruri go tlaa nna fela jalo. Ka mafoko a mangwe, tsela e botshelo jwa motho bo e tsayang, e laolwa ke ka fa a dirisang tshaloganyo ya gagwe ka teng.

Fa o tsaya sekai ka bagaka ba lefatshe jaaka bakwadi le balwela kgololesego bo Mme Maya Angelou, Rre Nelson Mandela, Rre Mahatma Ghandi le ene mogaka wa mo bosheng tota Rre Barrack Obama, botlhe le ba ba tshwanang le bone ba itse mosola wa go dirisa maatla a tshaloganyo go latela se ba se batlang. Se ke sone se se ba thusitseng go bona katlego mo gareng ga dikgwetlho tse di boima. Mme jaaka fa e le batho fela jaaka rona, ga go pale gore le rona re

ithute mo go bone botlhale jwa go lwantsha mathata a re leng mo go one gompieno.

Kwa ntle ga go ipotsa ka seemo sa itsholelo ya gago le dipeeletso tse o nang le tsone jaaka phenshene ya gago, o tshwanetse wa tshwenyega le ka boitekanelo jwa gago jwa mmele le jwa tshaloganyo. Ga se sephiri gore go nna o tshwenyegile ka madi go kgona go go koafatsa mo mmeleng le mo tshaloganyong. Ke gone ka moo re boneng go tshwanela gore mo lekwalong la gompieno la BOKAMOSO, re go fe methale ya gore o ka ithokomela jang go tla dingalo tse di amanang le letlhoko la madi. Mo godimo ga moo re go bontsha le ditsela tse o ka di tsayang gore o dirise madi a gago ka boikarabelo. Re solofela fa di tlaa go sologela mosola

Re kwalele o re bolelele maikutlo a gago ka seemo se lefatshe le leng mo go sone se.

Ke lo eleletsa Masego le mathogonolo.

Agatha



LABOTLHANO O O IKETLILENG: Dineo, Madoh le Barulaganye ba kgabile ka kapari ya setswana (mateisi)



### Lolwapa la DPF le na le ngwana o mosha

Mo dinakong tse di tshwanang le tse re leng mo go tsone tsa mathata, go a itumedisa go amogela dikgang tse di monate. Ka jalo erile fa mmereki ka rona Tshego Seilane a re begela gore o segofaditswe ka ngwana wa mosimane ka kgwedi ya ferikgong e tlhola malatsi a le masome a le mabedi, go ne go tletse boitumelo jo bo seng kana ka sepe mo dikagong tsa letlole.

Go ya ka fa mmagwe a mo tshalosang ka teng, Aatile Leruo Seilane ke lesea le le tletseng lethabo (fela jaaka mmagwe), o matlhagatlhaga ebile a na le monyenyo o montle. Tshego a re; “Ngwanake o tshotswe ka letsatsi le le botlhokwa mo ditsong. Ke letsatsi le go neng go bewa tautona wa Amerika wa motho-montsho wa ntlha Rre Barrack Obama. Ke itumelela gore letsatsi le ke tlaa le gopola ka ngwanake, e bile ke rapela gore se se mo rotloetse fa a ntse a gola gore le ene a atlege jaaka Rre Obama. Se segolo go di feta tsothle ke gore o nkokeleditse boitumelo mo botshelong jwa me. Ke ikutlwa ke segofetse e le ruri”



## GO TILA LETSAPA LA MOYA LE MMELE LE LE BAKWANG KE LETLHOKO LA MADI

Go latlhegelwa ke tiro, e ka tswa e le ka mofuta ofe fela, ke selo se se botlhoko, mme ebile go ka dira gore motho a nne a tshwenyegile mo maikutlong, kwa bofelong a feletse a koafala mo mmeleng le mo tlhologanyong. Go na le ditsela di le mmalwa tsa go ithokomela mo moyeng le mo mmeleng go tlhomamisa gore maikutlo a gago a nne a wetse tlase le tlhologanyo ya gago e bulegile mo gareng ga mathata.

Go sa kgathalesege gore a o ikaelela go tlogela tiro kgotsa nnya, o tshwanetse go nna le tebelopele ka botshelo jwa gago gore o tle o kgone go tla dingalo tse di tlang le letlhoko la madi. Leka maano a a latelang;

### Fetola tsela e o akanyang ka yone

Gore lefatshe le go itaa ka bokete jo bo kae, go tlaa laolwa ke tsela e o amogelang mathata a lefatshe ka yone; Fa o amogela mathata ka boitlhobogo, ka letshogo ebile o sena maano a go iphemela mo mathateng a a go apereng, seemo sa gago ga se kake sa tokafala. Se se botlhokwa ke go gakologelwa ka nako tsotlhe gore setsuatsue se foka se feta, ga se nnele ruri. O tshwanetse go nna o na le tsholofelo.

Tsaya dikgakololo tse di latelang:

O seka ware ka nako epe fela wa akanya gore go latlhegelwa ke tiro ga gago, kgotsa go tlhoka madi go supa fa o paletswe ke botshelo. Ikgakolole gore ga se wena o le nosi fela yo o wetsweng ke seru se. Dirisa seemo se gore o itshupe bonatla jwa gago ka go leka maano otlhe go intsha mo mathateng. Boitlhobogo ke jone bokoa, eseng se se go diragaletseng.

Fa e le gore o tshogile gore seemo se se tlaa thuba lelwapa la gago, Nna o gakologelwa gore se kgona go le tshwaraganya gape. Tshwetso ya gore a lelwapa le a thubega kgotsa nnyaa, e mo maruding a lona. Tlhophang tshwaragano, le go lwantsha seemo se ka maano a lo a dumalaneng ebile le a diragatsa mmogo.

Fa o tshogile ka bokamoso jwa gago le ba lelwapa la gago, gakologelwa gore phetogo nngwe le nngwe mo botshelong jwa gago e tla le ditshono tse disha tsa go itokafatsa. Fa o na le tebelopele, ebile o ikemiseditse go atlega mo botshelong, o tlaa atlega fa o leka ka natla.

Botlhokwa ke go amogela seemo o bo o loga maano a go intsha mo go sone. O seka wa nnela ruri mo kutlobotlhokong le tenego o supa yole le yole ka monwana. Seo ga se kake sa go thusa ka sepe ka gore fa o santse o dira jalo, nako e a go sia.

### Nna le lenaneo la go intsha mo mathateng a o leng mo go one

Go tlhoka madi kgotsa go latlhegelwa ke itsholelo, go ka go ruta go dirisa madi ka kelotlhoko fa e le gore o ne o ntse o sa itlwaetsa go dira jalo. Ka jalo go botlhokwa go dira lenaneo la tiriso ya madi a gago pele ga nako. Fa o baakanyetsa madi a gago o ise o a bone, o tlaa kgona go tla go a dirisa mo dilong tse o sa di tlhokeng mme o a dirise mo go tse di botlhokwa ka gore o a bo o nnile fa fatshe wa akanya pele gore dilo tse o di tlhokang go gaisa tsotlhe mo botshelong jwa gago ke eng.

Go nna le lenaneo la tiriso ya madi gape go ka go thusa go tla letshogo le le go tlelang fa o sena go lemoga gore ga o a dirisa madi ka fa tshwanelong, le dingalo tsa go salwa morago ke ba o ba kolotang o bo o felele o latlhegelwa ke dilo tse di botlhokwa jaaka ntlo, koloi le tse dingwe jalo jalo.

Fa o dira lenaneo la gago la madi, buisana le ba ba itseng ka tsa tiriso ya madi ba go gakolole fa o ka tswang o lebetse sengwe teng. O se ka wa ikanya tlhologanyo ya gago fela. Go na le batho ba ba ithutetseng maranyane a madi ba ba ka kgonang go go thusa gore madi a gago a gole.

### Ga go molato go kopa thuso fa o sitega

Fa o bona o sa kgone, mo maikutlong le ka tsela epe fela gape, tlhomamisa gore o kope thuso o ise o felelwe ke tshepo mo botshelong. Gantsi batho ba na le go tlhabiwa ke ditlhong ba tshaba matlho a batho fa itsholelo ya bone e ya kwa tlase, mme seo se felela se dira gore mathata a bone a golele pele go fetisa selekano. Ga go molato go kopa thuso, seo se supa bopelokgale. O ka leka metlhale e e latelang:

### Ba losika le ditsala

Ba ba go ratang jaaka masika le ditsala, ga se gantsi ba ka eletsa go go bona o sa tshele sentle. Bua le mongwe wa bone yo o mo tshepang a go thuse ka maano a gore o ka ithusa jang kgotsa wa thusiwa ke mang.





### Baitseanape ba tsa madi

Barutegi ba tsa madi, ba ka kgona go leba seemo sa itsholelo ya gago mme ba kgone go go tlela ka mananeo a a go thusang go intsha mo sedibeng se o wetseng mo go sone ka go go bolelela gore o dirise bonnyennyane jo o nang le jone jang. Maikutlo a gago a tlaa tokafala fa o lemoga gore go na le tsela e o ka itshetsang ka yone.

### Ba botsogo

O seka wa ba wa tsaya boitekanelo jwa tshologanyo ya gago motlhofo. Go nna o tshwenyegile mo moweng go diphatsa ka go ka go dirisa dipphoso bogolo jang fa o ithobogile, mme ebile go ka go tlišetsa le jone bolwetse tota jaaka malwetse a pelo, sukiri, go fetoga ga bokete jwa mmele, le madi a matona ( High Blood Pressure) le tse dingwe fela jalo. Ikopanye le ba bongaka fa o bona o nna o hutsafetse kgotsa o latlhegetswe ke kgatlhego mo dilong tse o tsholang o itumelela go di dira.

### Itshidile mmele

Ba bongaka ba tlaa go bolelela gore itshidilo e thusa mmele go lwantsa dingalo mo moeng le mo tshologanyong. Motho yo o nang a itekanetse mo mmeleng ga a latlhegelwe ke tshepo ka pele ebile tshologanyo ya gagwe e nna e thantse.

Ka fa mmele o ntseng ka teng, fa motho a tshoga, mmele le one o leka go iphemela ka ditsela tse di farologanyeng bogolo jang fa pelo e iteela ka bonako. Tshologanyo e raya ditshika e re di itsetsepele, madi le one a tsamaele ka bonako mo ditshikeng. Se se raya gore fa maikutlo a gago a ka tsaya lebaka a tsholetsegile, mmele le one o nna o ikatisitse o le mo seemong sa letshogo se se sa tlwaelesegang, mme o felele o tlelwa ke mangwe a malwetse a re setseng re a umakile.

Fa o itlwaetsa go itshidila mmele, se se ruta mmele gore o seka wa laolwa ke maikutlo a gago, mme o nne o le mo boitekanelong le fa o na le matshwenyego mo pelong. Tshologanyo ya gago e bereka botoka, maikutlo a kokobebe.

Tsaya kgato.



## DINTLHA

---

---

---

---

---

---

---

---

---

---

## TSELA PEDI O TSAYA EFE?

### Dirisa madi a o lebogisiwang tiro ka one ka kelotlhoko

Jaaka kwelo tlase ya itsholelo e farafere lefatshe jaana, dikompone di tshwaragane le namane e tona ya go fokotsa dikoloto gore di seka tsa wela ka lemeha. Nngwe ya maano a go dira jalo ke go kgaola batho mo ditirong ka go ba atswa ka lemehanyana la "tsamaya sentle".

Gore madi a gago a o a tsayang fa o tswa mo tirong atle a go berekele sentle, o tshwanetse go ikakanya sentle ka kelotlhoko gore botshelo jwa gago o batla bo tsaya tsela efe. Fa o setse o a tsere madi a, tlhomamisa gore o a dirisa ka fa o neng o rulagantse ka teng. Lenaneo le o tlaa le dirang ka madi a gago a le nne le le tlaa go sologelang mosola. Go na le dikgato tse o ka di tsayang go somarela madi a gago. Dingwe tsa tsone ke tse di latelang.

#### 1. Sekaseka bokete jo o bo bolokileng le gore bo tlaa go fitlhisana kae

Batlisisa gore fa tiro ya gago e ka fela ka tshoganetso, madi a a leng teng a ka go tshedisa go fitlhelela leng. Fa e le gore o bona a sa lekana mme o santse o theogotse, simolola go boloka go feta fa o ntseng o dira teng nakonyana e santse e le teng. Se se raya gore o fokotse go tswa o ya go ja mo mabenkeleng le ditsela tse dingwe tse o tlwaetseng go ijesa monate ka tsone tse di turang. Bula letlole la madi la tshoganetso mme madi otlhe a o a fokoditseng a o a tsenye mo teng.

#### 2. Go feleletsa sekoloto ke selo se se botlhale le fa o ka tswa o se mo mathateng.

Feleletsa go duela dikoloto o bo o latlhe dikarata tse di swaepang ka sekoloto (credit cards). Feleletsa dikoloi le matlo. Fa o dirile jalo, ga o kake wa tsenwa ke dingalo thata le fa tiro e fedile. Fa e le sengwe o ka bolawa ke tlaa fela mme sa botlhokwa ke gore o tlaabo o na le fa o robalang teng!

#### FA E LE GORE O TSHOGILE GORE TIRO E TLAA FELA, O SEKA WA BA WA TSAYA SEKOLOTO SE SESHA! - LE FA SE KA TSWA SE LE SENNYE JANG!

#### 3. Dirisa madi mo dilong tse di botlhokwa fela.

- i. Kwala dilo tse o di tlhokang o di tlhomaganye ka botlhokwa jwa tsone.
- ii. Duela tse di botlhokwa-tlhokwa pele, jaaka madi a sekolo a bana, ntlalo jalo jalo.
- iii. Kgaola tsa menate gotlhelele, le fa o ka tswa o saletswe ke a mangwe fa thoko, a beele kamoso, ga o itse ko o go yang.
- iv. Le tsone dilo tse di botlhokwa jaaka dijo, metsi le metlakase jalo jalo, di tshwanetse go somarelwa. Buisana le ba lelwapa la gago ka methale e le ka e dirisang go di somarela.

v. **SA BOTLHOKWA-TLHOKWA:** Fa o tswetse o ntse o imelwa o sa kgone go duela dikoloto sentle, ikopanye le ba o kolotileng mo go bone jaaka dibanka o buisane le bone ka mananeo a ba ka go thusang ka one go

isa dituelo kwa tlase. O SEKA WA BA TLHOKOMOLOGA.

#### 4. Jaanong o ya kae fa tiro e fedile?

Batho ba farologana ka dikeletso mo botshelong. Ka jalo go tlaa laola gore motho o fa kae mo botshelong, fela go botlhokwa go tsaya tshwetso e e lebyang. Dingwe tsa dilo tse o ka di dirang ke tse di latelang;

##### a). O ka simolola go ja phenshene

Mongwe le mogwe yo o setseng a le mo dingwageng tsa bogodi o tlaa kgatlhegela tshwetso e ka gore gantsi fa motho a gorogile fa, o a bo a setse a itiretse gole mokawana. Gape ga go motlhofo go bona tiro e ncha fa o setse o le mo dingwageng tse. Ba ba sa bolong go bereka ba boloka madi a phenshene ka lebaka ga ba na go nna le letsapa lele ba fisang pelong, ba tlaa ikwaditsetsa phenshene ka phuthologo. Fa o ka tsaya tshwetso e, gakologelwa jaana:

Kwelo tlase ya itsholelo lefatshe ka bophara, e dirile gore madi a dipenshene a ye kwa tlase ka boleng. Kgakololo ya rona ke gore fa e le gore madi a "tsamaya sentle" (separation package) a ka nama a go tshedisa sebakanyana, go botoka o ema sebaka se se sa fediseng pelo pele ga o simolola phenshene gore dipelo tsa mebaraka di boe di tokafale pele, o tle o boelwe ke madi a a go latlhegetseng. Mme le gale fa o tlamega go tsena mo phensheneng o tlaa thusega.

##### b). Bula kgwebo o ipereke

Fa o se lesego jaaka ba ba mo dingwageng tsa bogodi, o ka leka kgwebo, mme ebile se se tlaa go fa maatla a go bereka ka thata go ipaakanyetsa bokamoso o sa baya mo go ope. Dira dipatlisiso o botse baitseanape ba tsa kgwebo jaaka makgotla a ga goromente a a rotloetsang kgwebo bo CEDA le LEA. O seka wa inyatsa, e sere gongwe wa tloga wa latlhegelwe ke tshono ya go ikhumisa!

##### c). Ipaakanyetse tiro e e lateng

i). **Tsena mo letsomong la tiro:** Baakanya ditlankana tsa gago o nne o ipaakantse gore fa phatlha e bulegang teng o itshome. Jaaka dikompone di kgaola babereki ka bontsi jaana, nonyane ya motsogapele...'

ii). **Boela sekolong:** Fa e le gore o ntse o boloka madi a gago sentle, mme ebile le a "tsamaya sentle" a utlwala, gongwe o ka ya go ikoketsa dithuto tsa sekolo mo nakong e ditiro di santse di sa bonale gore e tle ere marara a itsholelo ya lefatshe a phatlalala, o kgone go bona tiro e e gaisang e e go latlhegetseng!





## MAETO A 2008 – A sefatlhego sa gago se teng mo meriting e? O lesego!

Re leletse mo 3614301 kgotsa 3614366 re go lebogetse ka mphonyana! Re lebogela matsapa a o a tsereng go nna teng mo maetong a rona le theetso ya gago e e botlhokwa!



## Dipotso tsa gago le dikarabo

### 1. A nka simolola phenshene lefa mabaka a ke tswang mo tirong ka one e se a bogodi?

Ee, go a kgonagala. Gore o simolola phenshene leng go laolwa fela ke dingwaga tsa gago. Fa o le mo dingwageng tsa bogodi o ka simolola phenshene go sa kgathalesege gore a o a bereka kgotsa nnyaa. Fa o tlogela tiro, tlhomamisa gore o supe mo difomong tsa phenshene gore o eletsa go simolola go e amogela.

### 2. Fa nka simolola phenshene, go diragala eng fa nka bona tiro e nngwe morago ga foo?

Ga go fetoge sepe gotlhelele! O tlaa tswela o ntse o amogela phenshene le fa o bereka. Phenshene ga e emiswe fa e setse e simolodisitwe. O e amogela botshelo jwa gago jotlhe.

### 3. Fa ke tlogela tiro ka go kgaolwa, a ke tlamega go tabola 33% wa phenshene gone foo kgotsa nka ema go fitlhelela ke a tlhoka fa ke fetsa a ke lebogisiwang tiro ka one?

O fiwa dikgwedi di le tharo fela go tla go tabola madi a phenshene morago ga o tlogela tiro. Fa di wela o latlhegelwa ke tshono eo. Go botlhokwa gore o ikakanye sentle o tseye tshwetso nako e le teng gore o seka wa tloga wa ikotlhaya nako e setse e fetile.

### 4. Fa nka tsena mo bogoding mo nakong e, a ke tlaa boelwa ke ditatlhegelo tsa dipeeletso tse di setseng di begilwe?

Nnyaa. Fa o simolola go ja phenshene, madi a gago a fudusiwa go tswa mo letloleng la ba ba santseng ba bereka a isiwa mo go la bagodi. Madi a bogodi ga a tsenngwe merokotso, ba fiwa dikoketso tsa phenshene fa go kgonagetse.

### 5. Fa e le gore ga ke ise ke tsene mo dingwageng tsa bogodi, a nka adima madi a me a phenshene?

Ga go kgonagale. Molao wa ga goromentse o kganela tiriso ya madi a phenshene mo go sepe fela se se sa amaneng le go e amogediwa. Le gone go e dirisa go sireletsa dikoloto tsa dibanka ga go letlelelwe.

### 6. A nka tsaya madi otlhe a me a phenshene fa ke tlogela tiro?

O letlelesega fela fa e le gore madi a o a kgobokantseng otlhe a wela ka fa tlase ga P10,000. Ba ba tsenang mo bogoding ba ka a tsaya otlhe fela fa e le gore phenshene e ba tlaa e amogelang kgwedi le kgwedi fa e sobokannwa yotlhe mo ngwageng e wela ka fa tlase ga P5,000. Fa madi a feta foo, ga go letlelesege.

### 7. Fa ke tlogetse tiro, a nka tswela ke ikgobokanyetsa ke le nosi?

Ka maswabi ga go kgonagale ka gore DPF ke letlole la babereki ba

Debswana le dikompane tsa lesika la yone fela. Le fa go ntse jalo, madi a o setseng o a kgobokantse a tlaa tswela a godisiwa ka merokotso ya dipeeletso go fitlhelela o tsena mo bogoding.

### 8. Ke eng e re fa re amogediwa phenshene re bo re kgethisiwa? A ga re a duela Lekgetho re santse re bereka?

Gakologelwa gore e rile o santse o bereka, Lekgetho la gago le ne le ntshiwa mo dituelong tsa gago morago ga go sena go ntshiwa koleke ya gago ya phenshene. Se se raya gore phenshene ya gago e tlišitwe mo DPF e sa kgethisiwa, ke gone ka moo o tshwanelang ke go kgetha. Le gale fela jaaka go dirwa mo babereking, phenshene le yone e kgethelwa fela fa e le kwa godimo ga P2500.

### 9. Ke eng madi a maloko a sa belediwe fela mo Botswana e seng kwa ntle ga lefatshe go tla ditatlhegelo tse di bakwang ke mathata a mafatshe a sele?

Mathata a kgona go tlhaga gongwe le gongwe, le mo Botswana tota. Ka go nne jalo, go botoka go re madi a phatlaladiwe mo mafelong a a farologaneng gore e tle e re fa bothata bo tlhaga golo gongwe, madi a mangwe a bo a sireletsegile mo mafelong a a sa amegang. Gape dipeeletso di bewa mo mebarakeng e e farologaneng jaaka go reka diabe, dikago, le go baya a mangwe mo matloleng a dibanka.

### 10. Ke eng DPF e sa fokotse dingwaga tsa bogodi go simolola ka 45?

E ga se tshwetso e e tswang ke rona mo DPF. Ke tumalano ya gago le mohiri wa gago, mme le gale kgakololo e re ka e go fang ke gore o ele tlhoko gore a e tlaare o le dingwaga di le 45 o bo o setse o kgobokantse phenshene e e ka go tshedisang botshelo jo bo kgotsofatsang, bogolo jang fa e le gore o simolotse go e kokotlegetsa morago ga nako.

### 11. Go diragala eng ka madi a me a phenshene fa nka swa ke santse ke bereka?

Madi otlhe a o a kokotleditseng, le merokotso ya one, a abelwa bajaboswa ba gago ka fa o tlhophileng ka teng. Tlhomamisa gore ngwaga le ngwaga o ntshafatse mokwalo wa gago wa bajaboswa.



## KGAISANO:

### BAFENYI BA KGAISANO E E FETILENG

Leletsang nomore ya  
3614301 go botsa ka  
dimpho tsa lona.

Shathani Chaja  
P.o.box 32  
Sebina

F. Phirinyane  
P.o.box 42  
Ramokgwebana

Tsabatho Raditloko  
P.o. box 749  
Molepolole


## DIPOTSO

Iteke lesego o arabe  
dipotso tse di latelang  
o tle o ikgapele  
dimpho (O seka wa  
lebala go kwala leina  
la gago fa o romela  
phetolo):

1. Ke komiti efe e moeteledipele wa letlole a tlhophilweng go nna leloko mo go yone?
2. Kwala dilo di le nne tse o ka di dirang go intsha dingalo?
3. Bolela maano a le mararo a o ka dirisang go fokotsa boima jwa dikoloto?

## ISAGO & LETLOLE

“Mosele wa Pula o epiwa go sale gale...”



Dumela Isago, o tshela jang mo malatsing a a botlhoko a? Kana mokwalo o dule kwa ntlokolo. A wena o a e Kgatlhegela VS? A re chaise monna re ye go lema re tlaa iphimola dikeledi ka phenshene. Ga go maswemaswe!



Nna tota ke eme tlhogo Letlole. Ga ke na sebaka se se leele ke ntse ke koleka phenshene, e bile ga ke dumele gore e tlaa lekana fa nka chaisa. Ga ke na ntlo, bana ba me ba ka tlhoka fa ba bayang tlhogo teng, ke na le dikoloto tse dintsi! Ka modimo madi a VS le a phenshene a ka felela otlhe mo dikolotong ra sala re sena se re se jang.

Hei Letlole, tota ga ke itse gore nka go araba ke reng. Ke gone fela gore ke ntse ke jela mo ganong. Jaanong ke lebagane le ditlamorago tsa teng.



Ao monna Isago, e le gore ka gore o na le dingwaga tse di masome a mabedi o ntse o berekela mmaene, ebile o nna mo ntlung ya mahala, o ntse o dira eng ka madi a gago ka o kabo o sale o agile wa ba wa salelwa ke chenchi e o e baya fa thoko?

Madi a phenshene ga a direlwa dikoloto le go aga matlo. O a baya gore a go tshedise mo nakong e e tshwanang le e le fa o setse o godile. Kago le dikoloto tse dingwe, ke dilo tse di dirwang fa o santse o bereka. Go riana o kabo o chaisa ka bogodi o sena tsapa le go fisang pelong. Nna rra ga ke a ka ka ikanya ntlo ya mmaene. Ke sale ke feditse ka tsa kago bagologolo, ebile dikoloto tsame ke tse ditshesane fela tse e seng tsa sepe. Ke ya go tlatsa difomo ke a chaisa fa ke tswa fa.

Sala sentle lekau. Re tlaa bonana.

